



Tir Yimiyim

www.tiryimiyim.in

Regd. No. RNI. NAGAAO/2004/13113. Postal-NE/RN-717.

e-mail : tiryimiyim@gmail.com

TAPAK 7

Yangia anidakangma :

f Tir Yimiyim

Instagram tiryimiyim@aolima

YouTube tir yimiyim

TAPAK 8

BJP nung madentsü aser Congress-a toktsütsü: Amarinder Singh

Philippine VP Leni Robredo-i tir atema tokteptsü



VOL. XVIII NO. 349 (ADOK 349) DIMAPUR

ROGONÜ (FRIDAY)

MONGPUTENI (OCTOBER) 01, 2021

₹ 5.00

Takhangba agüja aliba nung masetshii nokdaksü: Dimapur CSOs

Dimapur, Rongjui/Sept. 30 (TYO): Dimapur Civil Society Organisations ajungben senden ka September 30, 2021 nü Tourist Lodge Conference Hall, Dimapur nung mena liasü, ta sangdong ka ajanga ashi.

Iba senden nung lokti-i Chief Minister, Government of Nagaland nem Deputy Commissioner, Dimapur ajanga September 29, 2021 nü takhangba ka agütsüba nung masetshii nokdaksü molunga agizüka liasü, ta ashi.

Maneni Office of the Principle Secretary, Home, Government of Nagaland nungi sangdong (Press Release) ka ajanga mepishiba magizütsü lemtet, kechiaser takhangba ya Chief

COVID-19 vaccination drive nung ZyCoV-D amshitsü: Centre

New Delhi, Rongjui/Sept. 30 (Agencies): Linük tesem ajungalen vaccination drive agiba nung tekeratba nung Zydus Cadila indang needle-free Covid-19 vaccine ZyCoV-D amshitsü aser tang amshiba mozü dang nungi jenjang balala asütsü, ta sorkari Brehostibarnü sangdong ka nung ashi.

Osangbener senden ka nung jembiba mapang Union Health Secretary Rajesh Bhushan-i ashiba agi, sorkari iba mozü jenjang atema mozü yanglur den jembishinüba mapang lir.

Jenjang balala asüba ya talisa iba mozü ya dose asem aser needleless (ajem maliba) delivery system ajanga lir, ta pai ashi.

"Iba mozü alizütsü atema tang mozü yanglur den jembishinüba mapang lir. Ibai dose asem lir aser needleless delivery system alinung, tang Covid vaccination programme nung amshiba mozü jenjang dang nungi balaka alitsü," ta Bhushan-i ashi.

ZyCoV-D ya nisung dak amshitsü atema alima nung DNA plasmid vaccine mezüngbuba alitsü, koba COVID-19 anema Zydus Cadila ajanga yanglu. Drugs Controller General of India (DCGI) nungi August 20

Minister's Office, Government of Nagaland dangi yokba lir, Dimapur CSOs indang Media Cell sangdong ajanga ashi.

Senden nungsa Dimapur asoshi iba atema raratsü asoshi Dimapur Civil Societies aser Frontal organisations ajunga nungi Core Committee ka tentetsü pangjema liasü.

Dimapur asoshi inyakba nung tangatetba tajung sayua Dimapur nung Brehostibar anepdang 6:00 ako nungi nikongdang 6:00 ako tashi "Shutter Down" nung shilem agiba atema shishilempar, temolunger aser Dimapur nung aliba nübur ajunga dang maneni pelar, ta Dimapur Civil Society Organisation ajangasa ashi.

nü Emergency Use Authorisation atema iba mozü ya amshitsü temelaba agütsü, koba nisung arishi küm 12 nungi tema nem agütsütetsü.

Tang linük nung Covishield, Covaxin, aser Sputnik V mozü tem ya arishi küm 18 nungi tema alir nem agütsür aser dose ana lir.


ZyCoV-D ya "plasmid DNA" vaccine ka lir, koba nung genetically engineered, non-replicating version of a type of DNA molecule koba dang 'plasmid' ta ajar, ibaji amshir.

Iba mozü nung plasmids ya SARS-CoV-2 indang spike protein yanglutsüsa renema lir. SARS-CoV-2 ya coronavirus ka lir, koba agi COVID-19 adokdaksür.

Vaccination ajanga mozü agir temang nung aliba cells nem code agütsür, anungji virus tema nung ajem amai yanglu tenzüker. Immune system ajanga iba ya timtem amai agizütsü imlar aser iba atema antibodies yanglutsü.

Zydus ajanga ashiba agi, iba technology ya COVID-19 azüoktsü atema tapet lir, kechiaser virus tabu balala melenshia aoba mela-mela meteter.

Dimapur nung shishilempaba tesemtem ajunga shibang



Deputy Commissioner, Dimapur indang Office belentsü aliba anema Dimapur nung amenoka aliba civil society temi 'total shutter down' ayongzükba ama Dimapur nung September 30, 2021 nü mozü ayokba dokantem dak alaka danga dokan aser shishilempaba tesem ajunga shibanga liasü. Iba mokdang mapang mepetmesü timtem kecha majurui tiptema tembang.

Dimapur, Rongjui/Sept. 30 (TYO): Deputy Commissioner, Dimapur indang Office belentsü aliba anema Dimapur nung amenoka aliba civil society temi 'total shutter down' ayongzükba ama, Nagaland nung shishilempaba tesem, Dimapur nung September 30, 2021 nü dokan aser shishilempaba tesem ajunga shibanga liasü.

Tang aliba Deputy Commissioner Office ya Chumukedima nung yanglua aliba complex/ki tasenbai belentsü atema Home Department ajanga totuyuba agüja aliba ya agienang, ta takhangba agüja anepdang 6:00 ako nungi nikongdang 6:00 ako

tashi mokdangba ya Dimapur nung aliba civil society temi ayongzükba liasü.

Timtem kecha majurui iba mokdang süyigo, ta DCP (Crime), Dimapur Bharat Laxman Mankad-i osangbener dang ashi.

Kaket reju, bank aser office tem teti ama lapoka liasü aser gari aser tetsung agir senzürtem akhi ama liasü. Ajisüaka Chumukedima, Medzhiphema aser Niuland town tem nungbo dokan tem lapoka liasü.

Chumukedima town nung business inyakyim akhi ama liasü, kechiaser Naga Tribal Union Chumkedima Town ajanga Chumukedima town telungzük

nung yimya kecha nunga mokdangba malitsü telemtetba agia liasü.

Complex tasenbai Deputy Commissioner Office belentsü atema sorkari telemtetba agiba nung busema nokdaksü atema Union-i pangjemshia liasü.

Kasa mapang Medzhiphema Town Mechü Krotho (MTMK) ajanga Dimapur nung aliba DC Office Chumukedima-i belentsü renema aliba nung maneni nungittsü lemteta liasü.

MTMK ajanga "shutter down" ya aitsü aser junga masadangi iba ama mera agiba nung manidaksü, koba nübur ajungai molungba masü, ta ashi.

Deputy Commissioner Office belenbanung MTMK-i maneni nungittsü

Dimapur, Rongjui/Sept. 30 (TYO): Medzhiphema Town nung kin balala nungi lokti tentet tem den September 11, 2019 nü senden amenba mapang ajaki molungtepa agizükba ama Dimapur nungi Chümoukedima-i Deputy Commissioner indang Office belentsü aliba nung maneni nungittsü, ta Medzhiphema Town Mechü Krotho (MTMK) ajanga sangdong ka nung metetdaksü. Chümoukedima-i DC Office

belentsüba ya nüburtemi mapang talanga nungi aginüa aliba ka lir, talisa traffic sadema mejajatetba ajanga, infrastructural complex aser staff tem alitsü ki tajungba kuma yanglushiba, temeket tesatem aser tajung aser Medzhiphema subdivision kübok temalen aliba yimtsüngtem asoshia tanaba akumer, ta MTMK ajanga ashi.

Kuli tejangja makai iba office belentsüba maparen soittsü merangba CSOs tem dang mepelar

aser shidak angatetba nüburtemi sorkar totuyuba sülen anidaksüla, kong DC Office ya tanem tanemi Chümoukedima-i belentsü shia lir, ta sangdong ajanga ashi.

CSOs kari anir Dimapur district kübok tesem kar nung September 30, 2021 nü "shutter down" ayongzükba ya MTMK ajanga aitsür aser Medzhiphema Town nungbo iba ama junga masadang sentong nung manidaktetsü, kong nübur ajunga dena mali, ta ashi.

Nagaland COVID-19: Pungonü buba taneptsü angur timba

Kohima, Rongjui/Sept. 30 (TYO): Nagaland nung anogo pungo atongtepa COVID-19 cases tasen dang nungi taneptsü angur timba nung arur aser Brehostibarnüa iba tashidak nungi nisung 28 taneptsü angu aser nisung tasen 25 dak iba tashidak jangjateta caseload 31,219 kumogo.

"Tesüiba ghonda 24 tsüngta COVID-19 positive alir nisung 28 taneptsü nguogo aser itemji Dimapur nungi 11, Kohima nungi 11, Mokokchung nungi pezü aser Longleng nungi ana alitsü," ta State Nodal Officer for Integrated Disease Surveillance Project, Dr Nyanthung Kikon ajanga anogoshi COVID-19 osang sangdongba nung ashi.

Tanü COVID-19 positive cases 25 putetba ya Dimapur nungi 14, Kohima nungi tenet, Mokokchung aser Mon nungi ana-na alitsü, ta ashi.

State nung iba tashidak nungi taneptsü angur ya 29,227 alitsü

aser taneptsü anguba rate ya shilem 93.54 alitsü.

Tang active cases 358 lir aser item rongnung nisung 74 dak timtem sümia lir, nisung 9 tera timtema oxygen inoker lir, nisung pezü kanga sashia kangshia oxygen nung lir, nisung ka teimla kangabo mali ICU nung ventilator meinoki lir, nisung asem ventilator inoker lir aser nisung 267 dak iba tashidak agi temang nung timtem agütsüba mali, ta Dr Kikon-i ashi.

Tanü state nung COVID-19 agi asüba kata meliasü, anungji state nung asür ya 665 lir, aser item rongnung nisung 15 bo danga tashidak keter liasü, ta pai ashi.

COVID-19 tashidak agi shiranger nisung 994 danga state temi ogo, ta pai metetdaksü.

Tang tashinung Nagaland nung COVID-19 tashidak alitsü südi ta temolung melemteti sample 372,495 tendangogo.

Item ya RT-PCR ajanga 109,399, TrueNat ajanga 82,784 aser Rapid Antigen Test ajanga 180,312 tendanga liasü, ta Dr Kikon-isa ashi.

Nagaland nung Bodhbarnü tashinung nisung 687,750 nem COVID-19 vaccine doses 10,50,123 agütsüogo, ta State Immunization Officer, Dr Ritu Thurr-i metetdaksü.

State nung iba mozü agir alirtem rongnung frontline worker 60,926 alitsü, healthcare nung inyaker nisung 15,996, arishi küm 45 nungi tema nisung 198,154 aser arishi küm 18 nungi 44 tsüngta nisung 412,674 alitsü, ta pai ashi.

Nisung 362,373 bo vaccine dose tanabuba agia parnokbo vaccination course tembangogo. Parnoki frontline worker 47,239, healthcare worker 13,257, arishi küm 45 tema nisung 137,253 aser arishi küm 18 nungi 44 tsüngta nisung 164,624 alitsü, ta Dr Thurr-isa ashi.



Tanü alima ajunga nung tantsür-tamburtem anogomong amongba anogo nung, Akhoya nung tambuti Sakulepden (arishi küm 104) aser pa kinungtsü Sennükmla (arishi küm 101) na den 2019 Mokokchung Kongro Akümla lmsong, par asem külemi tawa agiba noksa ka yangi agütsür. Tena ya kibong kümer taküm 2021 küm April 23 anogo nung küm 78 jungogo. Tena den semchir teyaritepertem lir saka tenasasaa ki mapa inyaka soruchioka chiyongteter. (Akhoya, Sept.30, 2021).

PWD minister Tongpang Ozukum-i KVS school Tuli semdang



Minister Tongpang Ozukum, PWD aser Advisor Imnatiba nati KVS School, Tuli ketdangsürtem aser stakeholder tem den sensak asema noksa nung angur.

Dimapur, Rongjui/September 30 (TYO): PWD (Housing & Mechanical), aser Mokokchung DPDB mendenbuba, Tongpang Ozukum-i September 29 nü Kendra Vidyalaya Sangathan (KVS) school, Tuli semdangogo.

KVS school tebilemstütem idang lemsatepba mapang Workers Union Pulp & Paper Company Limited (WUNPPCL) tir A. Kika Lenda aser General Secretary Chubangangshi nati, school ki aser staff kitem ya 1995 küm nungi Nagaland Pulp & Paper Company Limited (NPPCL)-i anepalur, ta ashi.

Tenatisa, NPPCL-i school yanglushitsü aser anepalutsü

atema takokba tashi merandangogo, saka school ki aser staff tem aliba ki anepalutsü atema NPPCL dak tashi mali, ta ashi. Anungji lokti tenüng nung tenati state sorkar dang school terenlok asoshi teyari agütsütsü mepeshia asüngdang.

Minister Tongpang Ozukum-i, Mokokchung DPDB mendenbuba ama faculty aser stakeholders tem dang temulung majemtsü ajungshiba den pai school terenlok nung kecha tetsükdaktsü madoktsü atema takokba tashi inyaktsü tenangzüka agütsü.

Paisa, stakeholders aser school ketdangsürtem dang iba tesem nung aliba kaketshirtem

nem maneni kaketshisatsü tajungtiba agütsütsü mepeshi, kechiyong parnokji lokti tarutsü lir ta ashi.

Iba sülen minister Tongpang den Advisor for Industries & Commerce, Labour & Employment and Skill development & Entrepreneurship Imnatiba nati Adhoc town committee züngsem aser Changtongya jila administration den sensaksema liasü.

Minister-isa, Mokokchung district administration, urban development department ketdangsürtem aser Mokokchung jila nung tang yanglua aliba P. Shilu memorial park contractor tem ajurua sensak asem.

Raj Bhavan-i otsünü tetoktepba osang sangdongogo

Dimapur, Rongjui/September 30 (TYO): Nagaland nung aliba kaketshirtem atema "Relevance of Gandhiji's thoughts for building a peaceful and prosperous Nagaland" onük nung ajemdaker otsünü zilulepba toktepba ka ayongzüka indang osang sangdongogo.

Tetoktepba nung takok angurtem:

Dimapur district nungi Assisi Hr. Sec. School nung azünger Aoli Awomi-i (Class-8) mezüngbuba jenjang angu aser Lorna's Hr. Sec. School nungi Muwala-i (Class-XI) tanabuba jenjang angu. Tuensang district nung GHSS Thangjam, Tuensang nungi Chemie Shiu-i (Class-XII) temaba jenjang aser GHSS, Tuensang nungi Simi Kumari (Class-XII)-i tanabuba jenjang ngua liasü.

Peren district nung mezüngbuba jenjang GHSS, Peren nungi Rehungyibe Nsarangbe-i (Class-X) angu aser tanabuba jenjang nung Baptist Higher Secondary School, Jalukie-'B' nung azünger Merari Nbung-i (Class-XI) liasü. Zunheboto district nung takokerji GHSS, Aghunato nungi Likupu

Yepthomi (Class-XII) aser tanabubaji Woodland Hr. Sec. School, Zunheboto nungi Heshenoto Achumi (Class X) liasü.

Mokokchung district nung tetoktepba Jubilee Memorial School, Mokokchung nungi Alemmeren B. Longkumer (Class-IX)-i akok aser tanabuba jenjang nung Jubilee Memorial School, Mokokchung nungisa Senmangba Jamir (Class-X) liasü. Phek district nung Royal Foundation School, Phek nung azünger Kuyito Lohe-i (Class-IX) tetoktepba akok aser tanabuba jenjang nung Govt. High School, Chizami nungi Wemhete-U Puro (Class-X) liasü.

Kiphire district nung tetoktepba takokerji Loyola Hr. Sec. School, Kiphire nungi Kunyangla Y (Class-XI) liasü aser runners up ji Mount Horeb Baptist School, Pungro nungi Retsula (Class-X) liasü. Wokha district nung tetoktepba GHSS, Wokha nungi Loyani Ranghang-i (Class-XI) akok aser GHSS, Wokha nungisa Yanpolumi R. Kithan-i (Class-XI) tanabuba jenjang nung takok angu. Noklak district

nung tetoktepba GHSS, Noklak nungi K. Phunyang-i (Class-XI) akok aser Christian High School, Noklak nung azünger Peshie H (Class-X) tanabuba nung liasü.

Longleng district nung tetoktepba St. Joseph's School, Longleng nung azünger T. John Phom-i (Class-IX) akok aser Christian School, Longleng nungi Shingmei A. Phom (Class-X) tanabuba jenjang nung liasü. Mon District kübok tetoktepba St. John Hr. Sec. School kaketshir Ayit W-i (Class-XII) akok aser pa sülen tanabuba jenjang nung GHSS, Mon nung azünger Amit Thakur (Class-XI) liasü. Kohima district nung tetoktepba Riizhiikhrie GHSS nung azünger Vijayanand V. Thomas-i akok aser Stella HSS nungi Alinen Kent (Class-XII) tanabuba jenjang nung liasü.

Takok angurtem nem tetushi agütsüba sentong taoba mapang October 2 nung agütsü ta sangdonger aliba ama magitetsü. Tetushi agütsüba sentong indang osang tejangja mapang tatsüka tsüngda nung metetdaksütsü, ta ketdangsürtemi metetdaksü.

Kohima nung District Level Committee senden amen

Dimapur, Rongjui/September 30 (TYO): Clean India programme benoktsü atema District Level Committee senden ka Septemeber 30 nü DC conference hall, Kohima nung menogo.

Senden nung State Director in-charge, NYKS, John Makhabo-i Clean India programme indang action plan metetdaksüba mapang iba sentong ya October 1 nü tenzüksü aser October 31 nü

tashi benoka inyaktsü ta ashi. Clean India programme ya Azadi Ka Amrit Mahotsav kübok inyaktsü sentong yangluogo, koba linük ajunga nung jana bendena intokba nung nüburtem pei mulung ka nung arua shilem agidaktsütsü nükjidong nung tenzüka.

Paisa, iba sentong nükjidongji jana aser talisa khen dang amshiba plastic osettem merektetsü, lokti nung telen ajak, PRI aser NGO tem densema sorkar kübok lokti

tentet ajak anisemer Nagaland kübok district 12 prongla nung merekmeju sentong ayongzüksü aser "Jan Bhagidari" ajanga iba sentong ya nüburtem indang movement ka kümdaktsütsü aser 'Clean India, Safe India' yimyim ajungketsü asoshi lir, ta ashi.

Makhabo-i ashiba agi, October 1 nü nungi tenzüka 31 nü tashi nung iba sentong yagi linük nung district 744 kübok yimtsüng lakh 6 ayimjema inyaktsü, ta ashi.

Kohima nung October 2 nü merekmeju sentong ayonger

Dimapur, Rongjui/September 30 (TYO): Gandi Jayanti nüngtem nung aser Clean India Programme, Nehru Yuva Kendra Kohima Action plan dak ajemdaker Deputy Commissioner Kohima Gregory Thejawelie NCS-i sangdong ka ajanga October 2 nü 6:00 ako nungi tenzüka nübutoka merekmeju sentong ka ayongzüka metetdaksüogo.

Iba merekmeju sentong nung Kohima District kübok sorkar Institutions/Office/Colonies/Wards/yimtsüng ajaki shilem agütsü.

Kohima Municipal Council

Administrator, Chiephobozou/Tseminyu Town Councils Administrator tem, Hq/ Area Administrative Offices temi jana bendena intoktsü atema achaayangtsü.

Kasa mapang nung ketdangsürtemi maparen balala indang noksa aser video tatsütsü agi Phone No. 7005 175097 dangi whatsapp asütsü metetdaksüogo. Merekmeju sentong ayongzüka agiba mapang mask asema, tetsüngda ita inyakshiba amala COVID-19 dak sendakba inyakim ajak benoka inyaktsü, ta DC-isa metetdaksü.

Mokokchung DPDB senden menogo

Dimapur, Rongjui/September 30 (TYO): Ita shia amenba Mokokchung District Planning & Development Board (DPDB) senden September 30 nü District Planning hall, Mokokchung nung menogo. Iba senden ya Minister, Public Works Department (Housing and Mechanical), Tongpang Ozukum lenisüba nung amen.

Senden nung house-i Medemmera Women Multipurpose Society, Mangkolemba züngoksemsütsü

atema agizük. Senden nungsa ketdangsürtemi Fazl Ali College nung valley view girls hostel lenmang yanglushitsütsü aser LADP 2021-22 atem verification committee agizüka liasü.

Kasa mapang nung Department of Land Resource presented-i Mokokchung district kübok Coffee plantation dak sendakba nung PowerPoint presentation ka agütsü. Senden nung Advisor for Industries & Commerce & NIDC, Imnatiba-a dena liasü.

Security Forces-i Niki Sumi telok nungi züngsem ana apu



Dimapur, Rongjui/September 30 (TYO): Police den longjemer Security Forces temi September 26 nü Dimapur District kübok Hoito yimtsüng aser Purana Bazar nung Niki Sumi telok nungi züngsem ana puogo.

Osang tejangja angazükba sülen Security Forces aser State Police na longjemer meita aoba mapang, Goods Transport

Association Vice President Mughavi Zhimo'er kinungertem dak teka sangshia amokmerenba Niki Sumi telok nungi züngsem ana Hoito yimtsüng aser Purana Bazar nung apu.

Ken o maneni bushisüngdangtsü atema aija alisang ana ya East Police Station Dimapur nem bendanga agütsüogo.

NME-i audition agütsü aliba osang metetdaksü

Dimapur, Rongjui/September 30 (TYO): Mr & Miss Northeast India 2021 aser Mrs. Northeast India 2021 atema October 8 nü Dimapur Tourist Lodge nung Nagaland ajunga atema Nagaland Mega Entertainment-i ayongzüka audition agütsü. Iba tetoktepba final ya October 31 nü ATI Makhowa, Guwahati nung agütsü. Iba tetoktepba nung takok angur nem senpet sen lakh 1 aser sempet balala agütsütsü.

Iba tetoktepba nung takok angurtem taruba küm Phillipines nung agütsü aliba International beauty pageant nung tokteptsü atema maongka

angütsü. Iba tetoktepba nung shilem agütsü atema Nagaland tenüng nungi tokteptsü atema nisung 15 nungi 20 (tetsür aser tebur naprongla) tsüngda shimtsü.

Audition nung shimertem final nung indang indanga shilem agitetsü, ta Advisor NME Kekhriehzahzo Solo-i ashi. Iba tetoktepba atema tetendangertemji Nagaland Mega Entertainment nungi, Samuel Achy Phom, MATZP Institute of Fashion Designing Director Doichong Buchem, aser Glamours Hub Entertainment Nagaland mendenbuba Sasongdangba Yaden asütsü.

ULFA-I nung züngsem tasen aniokba maparen potet



Guwahati, Rongjui/September 30 (Agencies): Assam kübok Sivasagar district nung ULFA-Independent züngsem tasen aniokba inyakyim ka potetogo.

ULFA-I indang züngsem tasen aniokba inyakyim ya Sivasagar district kübok Namtola tesem temeket nung benoka inyaka lia potet.

"Assam nung ULFA puri züngsem tasen aniokba osang tejangja angazükba sülen Spear Corps kübok Joypur Battalion aser Sonari Police la longjemer meita aoba sentong ka benoka

inyakba mapang September 29 nü iba inyakyim poteta liasü," ta Army sangdong ka ajanga metetdaksü.

Iba meita aoba sentong benoka inyaksangshiba mapang security force temi lanur tenet pua liasü.

Item lanurtem ya India arrtsü adener oa Myanmar nung amenoka aliba training camptem nung training agi oya aliba mapang apu.

"Iba sentong benoka inyakba sülen Namtola nungi lanur tenet puogo. Parnok ya arrtsü adena orr Myanmar

kübok ULFA training camp temi oya lia apu," ta kasa sangdong ajanga metetdaksü.

Kasa mapang nung Security force temi apuba lanurtem ya local police nem bendanga agütsüogo.

"ULFA-I züngsem kati parnok iba telok nung anisemba lanurtemi nangzükogo," ta Army-isa ashi.

"Lanurtem rongnung 2016 küm bendanga agütsür alirtem aser parnok rongnungsa nisung ka küm ana shi iba telok nung adentsü merangdang ka densema liasü," ta Army-i ashi.

Akhil-i Congress dang Raijor Dal candidate pusemstsü mepeshi

Guwahati, Rongjui/September 30 (Agencies): Assam nung Assembly menden tazüing aliba atema by-poll agitsü sangdongba sülen state nung party tem renemshitep tenzükogo.

October 30 nü Assembly constituency pongu nung election agitsü sangdongba sülen Assam nung political party temi nüburtem atsüa arutsü merangtepdar.

Kasa mapang nung Assam nung opposition party; Raijor Dal-i Assembly menden pongu nungi ana nung tokteptsü sangdongogo.

Iba osang ya Raijor Dal tir aser Sivasagar MLA Akhil Gogoi-i Guwahati nung Bodhbarnü osangbenertem den sensaksemba mapang ashi.

Akhil Gogoi-i ashiba agi, Raijor Dal pur Thowra aser Mariani Assembly menden atema tokteptsü.

Gogoi-isa, par party-i menden anaprongla nung takok angutsü ta temulung lema bilemba lemsatepogo.

Maneni Akhil Gogoi-i Thowra nung tokteptsü atema party candidate sangdongogo saka Mariani menden atema candidate tang tashi meshimi lir ta ashi.

"Thowra menden atema

Raijor Dal indang candidate ji Dhajya Konwar asütsü. Onoki Mariani menden atema candidate yakta sangdongtsü," ta Akhil Gogoi-i ashi.

Temetetsü kaji taküm küm Assembly election agiba mapang Thowra aser Mariani menden anaprongla ya Congress-i koka liasü. Ajisüala MLA anapronglai party toktsü aser MLA mapa-a toktsü.

Kasa mapang nung Akhil Gogoi-i Assam nung Congress party dang külem tükchir BJP tsükdaktsütsü atema Raijor Dal-i shimba candidate tem pusemstsü mepeshia metetdaksüogo.

"Congress-i onok candidate tem pusemra onokia parnok toktepba tesemtem nung parnok candidate tem pusemstsü," ta Akhil Gogoi-i ashi.

Thowra, Mariani, Bhabanipur, Tamulpur aser Gossaigaon menden atema By-poll October 30 nü agitsü.

Tang Assam nung BJP pur MLA 59 aser parnok pusemer AGP MLA 9 aser UPPL MLA pongu lir. Kasa mapang nung Congress pur MLA 27, AIUDF 15, BPF asem aser CPI-M MLA ka lir. Assembly nung Raijor Dal party nungi Akhil Gogoi kija lir.

Meghalaya nung MTC bus ka tsükok; Nisung 6 asü



Shillong, Rongjui/September 30 (Agencies): Meghalaya Transport Corporation (MTC) bus ka Shillong-Tura lenmang nung Ringdi ayongi jioka aiba sülen nisung trok asü aser nisung 12 dak tema yirua liasü.

Iba lendong ya Brehostibar anepdang East Garo Hills district kübok Nongchram tesem nung ataloka liasü.

Iba lendong nung nisung 16 yirua liasü. Gari tsükokba lendong nung yirurtem ajak Williamnagar aser Tura nung mozükitemi anirogo.

Osang ajanga ashiba agi, iba bus ya tsükokba mapang kanga kara oya liasü.

Kasa mapang nung iba

lendong nung nisung ka samara bushitepdar, ta metetdaksü.

Osang agütsüba mapang tashi nung asürtem mejangjai liasü aser iba bus nung mena alir kinungertem dang osang tejangja agitsü atema East Garo Hills police control room den tngteprateptsü atema metetdaksüogo.

Maneni Meghalaya chief minister Conrad Sangma-i bus tsükokba lendong nung asür kinungertem den asüku lemsatepogo.

"Nongchram apu nung tia maka MTC bus tsükoka senti taküm samaba osang angazüka temulung züreper. Astür kinungertem den asüku

lemsateper aser yirur alitem takaratiba nung taneptsü angutsü imlaja atar," ta Conrad Sangma-i tweet asü.

Meghalaya minister James Sangma-i ashiba agi, lendong nung yirur alirtem temang anepalutsütsü atema pai achaayangdar.

"Nongchram apu nung MTC bus tsükokba dak sendakba nung yirur temang anepalua alirtem nem teyari agütsütsü atema ni anepaludar. Doctors & healthcare staff temi parnok nem takokba tashi treatment tajungtiba agütsüdar. Nisung kar danga teyari nungdaka lira kü den tongteprateptsü arendaka teli," ta James Sangma-i ashi.

Nisung 1741 dak COVID-19 potet

Aizawl, Rongjui/September 30 (Agencies): Mizoram nung COVID-19 tensa tamajungba küma odar aser Brehostibarnüa nisung 1741 dak tashidak potetogo, ta sorkar source kati ashi. Kasa mapang nung iba tashidak agi nisung ka süogo.

State nung tang tashi nung nisung 93,660 dak COVID-19 tashidak potetogo aser nisung 307 süogo, ta kasa sangdong ajanga metetdaksü.

Mizoram nungsa yashi nisung 1380 dak tashidak potet aser nisung asem asü.

State information and public relations department sangdong ka ajanga ashiba agi, tang tashidak potetertem rongnung tanura 304 densema lir.

Mizoram nung anogo ka nung tashidak potetba rate 18.44 per cent lir kechiyong sample 9,440 tendangba nungi nisung 1741 dak tashidak keta aliba potetogo.

Teti ama Aizawl district nung nisung (915) timba dak tashidak potetogo aser Champhai district (388) aser Lunglei district (117) nunga nisung noklang tema dak tashidak poteta liasü.

Mizoram nung tang nisung 16,841 dak tashidak menar lir aser tang tashi nung nisung 76,512 taneptsü nguogo.

Sorkar bulletin ajanga ashiba agi, Aizawl district nung tang nisung 11,649 dak

tashidak poteter temang anepaludar aser Aizawl sülen Siaha district (1,078) aser Lunglei district (925) nung nisung timba dak tashidak poteta lir.

Saitual district nunga nisung 32 tashidak agi tonger lir.

Ajisüaka jila nung Covid-19 tashidak menatepa aoba tezü raksatsütsü atema Saitual jila temeket ajunga September 29 nü nikongtsütsü 7 ako nungi tenzükoka mokdanga yuogo.

Mizoram nung tang Covid-19 recovery ji 81.69 per cent aser tasüba rate 0.32 per cent lir.

State nung Brehostibarnü tashi nung sample lakh 10.97 dak tema tendangogo.

State immunisation officer Dr. Lalzawmi-i ashiba agi, Bodhbarnü tashi nung nisung lakh 6.8 dak tema nem vaccine agütsüogo aser item rongnung nisung lakh 4.36 nembo vaccine dose anaprongla agütsüogo.

Kasa mapang nung state health minister Dr. R. Lalthangliana-i, facility maliba district ajaka nung RT-PCR laboratory amenoktsü, ta ashi.

Mizoram nung Zoram Medical College (ZMC) nungdang RT-PCR laboratory ka amneoka lir. Aizawl anasa aliba Zoram Medical College ya dang state nung Covid-19 mozüki lir.



TIR YIMYIM YIMOBILEM (EDITORIAL)

DIMAPUR ROGONÜ, MONGPUTENI(OCTOBER) 01, 2021

Tantsür tambur anogo

Tanü ya alima ajunga nung United Nations sentong ajanga tantsür –tamburtem anogomong amonger. Atangji, tantsür-tambur ta asüba ojang aser osüji tanganütsükabo masü, kechiyong khen bilemstübo parnok dak nungi imlatsü kangabo mali, joko taolen talangba. Iba jagi, asenokibo tanü anogomong dang ya awashi meteta "Teintet Rogo mong" ta ajar. Ajisüaka, shidi asünungbo teintet ta asüabajibo tantsür tamburbo masü aser tanur-a masü, anungji aiür asangur mesüra kijung lanurtemang teintet purtemji lir. Aji oda, tantsür tamburtemjibo teintet dang nungi taoba, tajangshiba anungji temetetba. Itemjiang, shitakba nungbo alima rongsen, lanurtem aser kijung lanurtem asoshi taküm lenmang sayurtem lir. Parnokji ajak asoshi tesayurtem, kechiyong parnokiang alima aser anung nung atalokba otsütem aser sobalibatem meteta lir, anungji parnokji temetetnüba kechisarina asündangdak asündangdong lir. Item ama senti takümtem tushia amongtsüba anogoji tanü lir. Tantsür tambur mapang ya tedongner aser tenguner ajaki atonger aser angur masü saka Tsüngremi meimertem nem Pai arishi agütsür. Taküm 2021 küm iba alima tantsür tambur anogomong (International Day of Older Persons) omen ya "Digital Equity for All Ages" ta shimteta lir. Tetezü, ibai computer putu asünungji, computer amshiyim ya aiür asangur aser kijung lanurtemi dang masü saka tantsür tamburtemia ashitsüla ta asenok ajak nem angatetdaksüner. Iba omen ya kodang bilemdangdir, atangji tanü asenok aliba computer putu nung asenoki tantsür tamburtembo computer amshitsü menügdak amai bilemer. Iba jagi asenok o parnok na alima balala nung alir amai kümogo. International Telecommunication Union (ITU) ajanga ashiba agi tanü putu nung ya tetsür aser tantsür tamburtem aika computer amshi memetetba agi taküm pelaa melitetba purtem lir. Aji oda, tanü alima nung nütsüng yongsük tesadang kati internet amshi mashiba agi takoksa jenti angur aser item rongnung tantsür tamburtem aika dena lir. Computer amshi ashitsü nungdakba indang jembidang, asenoki table nung yur amshiba computer tulu indang jembir amai bilemstüa akok, saka tanübo asenoki tangar den tongteprateptsü asoshi amshiba mobile phone ajak ya computer lir. Iba phone ajanga o jembir, noksa yoktepa reprangteper,shiti züluteper, kidang mena yur bank nungi sen agizüka shishilembateter, ita sen aser pension sen aitba aser agizükba metetter, alima tesem balala nung nisung balalai atenba ken aser sayutsüngiba o angar. Aji oda, kidang mena yur alima kinük pezü sülen atalokba noksa repranga osang angar. Joko, tang nungibo computer ajanga nisung shia taküm anema alitsü atema doctor den asündangtepa teyari agitsü akoktsü aser item ajakji teka nung mobile phone tilaka amma yur inyaktettsü. Iba computer inyakyim aser amshiyimji tantsür tamburtem danga sayutsüla aser angazüka amshidaktsütsüla. Asenok aikati tantsür tamburbo mobile phone menügdak amai bilemer, ajisüaka parnoksa tenügdakba, kechiyong parnok ket nung mobile phone alibaji medemer tajung ka ali ama anogoa tao memetet, yangji sensaksema kazütsü. Joko, alima nung nisungtem tashitemetet ulua aküm nungji,temang amshi shia aliba agi akhidang dang nungibo tanü arishi kanga agia talangba alir. Akhidang, küm 40 jakdangbo nisung ka arishi 50 tongra kanga tantsür tambur ama angu aser arishia tatsü liasü saka tanübo arishi küm 70 nunga lanur ama kümküma litetter. Aji oda, arishi küm 80 aser 90 purtemia gari anir jajar aser mulungzüng agi akhi tejen otsü ajak shitetter. Joko tali ashirtem asoshibo, alima ya kotak mesük,kodanga tain makümba lima ka ama kümogo. Iba ama lima ka nung oja oba dang masü saka otsü obou ta ajatsüsa litettertemji computer putu nung alir rogotem lir. Parnokji kijung lanur asüdangbo nisung nungdak dang tonga tajai ao aser tazüngertemi dang alima nung atalokbatem meteta liasü, saka tanübo computer amshi metetetba ajanga kijung lanurtem dang nungibo tantsür tamburtemang teyakyakba aser temetetba kümogo. Joko, tantsür tamburtem nem ajok agütsütsüba putu masü saka smart phone agütsüba putu lir. Parnoki ajak inyaktettsü, anungji parnokibo kecha memetet, kecha mamshitettsü aser meinyaktettsü ama asenoki mebiblemli. Iba tangatetba nung, tanübo, asenok ajaki online ajanga tantsür tamburtem dang parnok anogomong salem shia peladaktsüdi.

OLEMSABANG

Tantsür-Tambur Nongmeso O

IMPACT telok ajanga senior citizens ajak dang United Nations International Day of Older Persons (UNIDOP) temoatsü anogo Salem abener. 2021 UNIDOP omen "Digital Equity for All Ages" dak ajemdaker alima rangpen nung tanü anogo amonger.Tanü putu nung mepong nung dang osang lemsateper aser maparen inyakteper .Yamaji alima 'Technology' pettepa enloka aobaya ngur - ljiip lima nung manna yokdang Ya Kechi ? da sungmangba medem "Nenek" ah sungmanga alitsü sudi. Kar dak alaka, tantsür-tambur timba shilem Technology oset tsüset amshiba aser Digital maparen nung tsükdaker. Iba khuret ji ajiteta United Nations ajanga technology ya kümsük ajak den putepba renloktsü ajungshir.



Aki putu aluyimba mapang boh 'Nenek-i'Khu mejonga bener, anuh jangragedemi leman nung tembang lüna sa adok sudi. Tashi tait aser shisa teratet aki asen sobaliba tajung benshia arudaki. Aser anuh tanü putu nung nenok shisha meden-i lanurtem dangatetba aser sobaliba nung mapensatsü. Tsüngrem O nung shia aliba "teraji nai mesür masü,saka,terai na mesür" medem alima tensa komaka melenshia ainnunga Nenok sayutsüngi aser sobaliba taret temji lanur longzük long asütsü.

Tanü putu libaliroba ajidangra Technology aser Digital teyari meбайдokteter. Alima den tsüngsü medema aotsü asünung asen-a iba rong nung ji adentsüsa akümer. Saka tantsür-tambur kar-ibo "Haoni, jokola onok mapang süirji technology ta asübaji onok ibo kecha memetet" mesüra "onokbo tashi maitji tanürtemi mesüra lanurtemi onok atema inyakttsütsüba danga" ta bilemya alitsü sudi, Hao! aji shitak! Sakasa, temeim otsüla- obula nungertem! asenok ajaki metet, küm nung tain akümer dangashi shisatsü renlokba nungbo kodanga tain makümer ako, pei sasa "ni joko kecha mangazüktettsüa" ta bilemra onoki kodaka ajungshi yunga mesüra sayutsü merangyunga tensa den apet liro medema aotsüji kangadang tasak. Hao, Küm nung ainba den külemi shi nunga tashi meiti akümtsüsa tensai a bener aruadoker. Saka asenoki dang angazükti aser merangerbo shisatsü nungbo kodanga tain makümtsü. Yamaji tensa ajak nung liromedema otettsü.

India nung küm 60 tema nutsüng (elderly population) 138million lir, aser 'National Statistical Office(2021) NSS 75th Round: Social Consumption on Health in India 2017-18 osang ajanga - Economic dependence (in rural areas) :Proportion of elderly males fully dependent on others is lowest(4%) in Nagaland and dependency of elderly female is second lowest in Nagaland(35%)' Item osang ya reprangdangra asen lima nung Tantsür-tambur küm aki lepba ka chirnur dak menendak-i bei tashi aser shisatsü lola maoba temaitsü ajiteter. Yamaji lephsia ashir Nenok-i nur chirnur-semchir kokteta nubu, rongsen ase shisatsü tajung aki aniteter nung "Oja-oba Otsü-Obü nenok-i technology aser digital mopung ji kudasür mekoktettsü-a jha"

Shin O nung shia aliba ama 'Jangyu memetem koda tsüngsangtsü'. Alima renloka aor - lanurtem media ajanga dang sensakteper, office mapatem timba shilem digital akümer, senden osang tem ajak phone ajanga sangoktsür/akiteper, kaketshirtem online ajanga akir, bank maparen digital-based akümer - yamaji asen lima nungdak aser inyakyim ajak iba tsüngsü nung jajatsü sa adoker.Anungji item khuret arangshitsü ji laurtem-i anir Tantsür-tambur ajungshia leman satema yanglutsütsüla. Technology aser gadgets koma amshitsü iba ama training akatsütsüla aser tantsür-tambur tem-i jangra amshitettsü oset-tsüset (old age friendly gadgets) shimtetta sayutsüla. Yamala mesukba sendong aser inyakyim ajanga "Digital Equity" nükjidong tongtettsü ta yimlar.

Lanurtem asenok nokyumedem-a otsüla-obula den külemi katika ajungshitepa lensa aostü mapang ako. Hao, asenoki asen tsüngdabo "Parnok tantsür- tamburtem ya tashi kanga manger" ta jembir ska asenoki parnok angatettsü memeranger aser yamaji parnokia sayurbo inyaktettsüba mapa aika asenoki inyakra doker. Anu asen temeim otsü-obula nungertema küm nung ainba den külemi shisatsü rama aotsübajia meimchir yimya dang. Saka onok lanurtemi teti dangbo ajakji rajema shisatokden mapang magiteter asünung, nenoki arendaka meli onok den lemsatep nung ajak asoshi temoatsü asütsü, aser yamaji kija aser lokti jangyu metema otettsü da yimlar.

Tatensa omen dak rangloker IMPACT telok ajanga technology aser digital lima den lirumedema aotsü tsürena tebilem ta Tantsür-tambur dang mepishir. Nur jala-jabaso-semchir tem ajak senteper arok khuret ama süloka bener aotsü ako da nongmeso-a sangoktsür.

"Küpu apuba kolakji sentsüwangshi korang; aji temeshiba taküm ajanga ajangzüker"
- Apijemtsü Shin 16:31

Tsüngremi temeim Tantsür-Tambur ajak maneni Taküm tajung, Arishi aser Shisatsü moajangma.

Iba Olemsabang nung lemsaba ken-o aser shisatsü ya iba ocet züluri bilemba ken-o ama tazüngerü angateta agitsü mepishir

Caritas Pakistan-i talidak malir Khristantem nem teyari agütsü



Pakistan kübok Karachi yimti nung talidak malir Khristantemi Caritas Pakistan ket nungi teyari anguba sülen tangokba noksa nung angur.

September 30, 2021: Pakistan kübok Karachi yimti nung talidak malir Khristantem nem Caritas Pakistan Karachi-i chiyungtsü den nungdakba osettsüset aika teyari agütsüogo; iba mission atema Missio Austria-i senotsü teyari agüja liasü.

2020 küm Karachi nung tüzümsüng lendong tuluka atalokba sülen Supreme Court tetuyuba nung ayong anasa aliba ki aika bendoktsüba sülen Khristan kibong 150 densema nisung meyrjang aika talidak makai kümogo.

Caritas Pakistan Karachi executive secretary, Mansha Noor-i, "Caritas

tetezü temeim aser ozü teloki nisungtemi mayimjemtetba tesemtem nung timtemertem yaria arudar," ta metetdaksü.

Paisa ki malir Khristantem dang nenok tsüngda yaritepa alitsüla aser ki asütsü atema temeden meshia longjemer raratsüla aser nenoki iba atema raraba nungji onoki yaritsü, ta metetdaksü.

St. Jude Arogo nung putir, Mario Rodrigues-i, "Onoki teti Tsüngrem nem tenüngsang agütsütsü. Onok nem teyari agütsürtem, talisa

Mission Austria aser Caritas Pakistan nati senotsü teyari agütsüba atema parnok

dang pelar aser parnok atema sarasademtsür," ta metetdaksü.

Ayong anasa ki sür aliba ajanga tzü sadema mayimer, aser ibaji ajanga tüzümsüng lendong atalok, ta shia Supreme Court-i ayonga anasa aliba ki ajak bendoktsü tuyua liasü.

Godhar Camp, Sadiq Nagar, Siraj Colony, Bara Maden aser Gujja Nalla kiyongtem nung ki ajak bendoktsüba ajanga Khristantem densema nisung meyrjang aika talidak makai aküm. Item tesem nung St. Philip, St. Jude aser St. Michael Arogotem lir.

Kiyimbaji tetsür ka aser tebur ka na tsüngda dang asütsüla: EFCW

September 30, 2021: Wales nung Arogoi kasa tetsür o tetsür na aser tebur o tebur na kibong kümer alirtem moatsütsü atema telemtetba agiogo, ajisüaka Evangelical Khristantemibo ibaji ashishisa tongti putir tasen ka shimtsü akhanger.

UK kübok Church in Wales nung Anglican Arogo trok lir aser Arogoi kasa o kasa kiyimba sentong ketdangsüa magir saka item ama kibongtem moatsütsü atema September ita nung vote agütsütepa bill ka agizüka liasü.

Hombarnü (September 27) nü Church of Wales kübok Evangelical Fellowship-ibo iba telemtetbaji ashishir, ta metetdaksü.

Evangelical Fellowship of Church in Wales (EFCW)-i Governing Body dang tongti putir tasen ka shimtsüla; kiyimbaji tetsür ka aser tebur ka na tsüngda dang asütsüla, ta tangatetba alir ka tongti putir shimtsüla, ta takhangba agütsü.

EFCW-isa, Church of Wales Governing Body telemtetbaji Church in Wales nung züngsem timbakati maginer, ta metetdaksü.

"Governing Body-i kasa tetsür o tetsür na aser tebur o

tebur na kibong kümer alirtem moatsütsü atema telemtetba agiba atema EFCW-i kanga saras," ta parnokisa sangdong ka ajanga metetdaksü.

"Yisu Khrista osangtajungji nisung ajak asoshi lir, ajisüaka kasa o kasa kibong kümer alirtem Arogoi moatsütsü atema telemtetba agibaji tai," ta parnokisa metetdaksü.

Church in Wales-i Laishiba tesayuba nungi ainshioogo ta onoki bilemer, ta EFCW-i metetdaksü.

"Iba telemtetba agiba ajanga Tsüngrem Arogo nung telungjem raksatsüogo. Iba ama telongjem raksaba ya tebilemstü onük tuluka lir, kechiyong ibaji ajanga Tsüngrem melung jashidaksür," ta parnokisa metetdaksü.

"Nisung aikati Arogotem nem tenla agütsüba anenogo aser aikati Church of Wales nung maneni adentsü asü toktsütsü, ta telemtetba agitsü atema teyari bushidar," ta parnokisa metetdaksü.

September ita tetenzüklen Wales (UK) nung aliba Arogotemi kasa tetsür o tetsür na mesüra tebur o tebur na kibong kümer alirtem moatsütsü atema vote agütsütepa bill ka agizük.

Church in Wales' Governing Body senden nung vote agütsütepa iba bill ji agizük, ajisüaka Arogo nung kasa tetsür o tetsür na mesüra tebur o tebur na kibong akümstü atemabo memelatsü.

Taruba küm pongu tashi tendanga kasa o kasa kibong akümertem Arogoi moatsütsü, ajisüaka parnok ama kibong akümertem moatsütsü atema sentong agitsü mesüra magitsü jibo putirtem melung südaktsütsü.

Church in Wales' Governing Body nung züngsemtem asemstü nungi anasü vote agüja iba bill agizüka liasü.

Church in Wales' Governing Body senden nung putir 28-i iba bill agizük aser putir 12-i iba bill anema vote agütsü.

Yaküm Church of England-ia iba ama bill ka magizüki liasü, tang Church of Scotland nunga iba ama bill ka agizüktsü atema jembidar aser Church of Ireland-ibo kasa o kasa kibong akümertem Arogoi memoatsür.

Taküm June ita nung UK nung Methodist Arogoibo tetsür o tetsür na aser tebur o tebur na kibong akümstü melaogo saka Ireland nung Methodist Arogoibo, kiyimba ya tetsür aser tebur na tsüngda dang asütsüla, ta metetdaksü.

ANOGO ABEN TSÜNGREM DEN

TSÜNGREM SENTSÜWANGSHI KULI

O Kibuba ozü Kibuba, alima ajak nung ne tenüng koda tamaren! Nai ne sentsüwangshi anüngtem temalen adokdaksür. T Ken 8:1

Chuba Dawid-i, pa taküm nung tajangshiba ajak ajangshir, iba T.Ken nungya pai pa tanela, shisatsü, tashi aser tangatetba ajaki Tsüngrem nem tenüngsang agütsür. Dawid-i tongtibangsa nisung taküm ka Tsüngremi iba jenjang nung yanglua toktsüba ya pa süngmanger. Dawid-i ashir, "onok kotak tenyar dang nungi tera agi dang tekübokba yangluba ya koda? (T. Ken 8:5). Meimchir taküm ya reprangra, ya tesüngmangtsü mapa ka lir. Asen Tsüngrem teka tashi agi kangadang tobur junga aser pa tasa agi atongteta taküm ka yanglua, tangula apuktsüba aser iba taküm ka ya Pai atongteta yutsüba arishi tembangra, tanela jenjang kümzüktsüsa asen Tsüngremi asenok meimchir nem iba maongka agütsüba ya, Tsüngrem Na koda Tulu lir!

Süra, asenoki Tsüngrem peladaksür asü masü, pa sentong nung alir asü masü? Pai ashiba angar asü masü? Pa Ozüng nung jajar asü masü? Pa temeshiba nung asenoka lir asü masü? Temeim adianutem, Tsüngremi asen taküm ya pa maongka tulu nung yangluadoktsü, süra Pa tushitsüsa asen tanela, tamang koma lir? Asenok ya Pa sentsüwangshi nung alir. Tenüngsang agütsüdi.

SARASADEM

Temeim Tsüngrem, Ne Sentsüwangshi mapa ya onsara tajung aser tulu lir, Ne nem tenüngsang agütsür. Amen

Kaduna State nung Fulani teloki Khristan 44 tepset

September 30, 2021: tsütsü masü saka south September 26 (Amongnü) tsütsülen ang ataloker? Iba ya aonung Nigeria kübok yimsü nung ajemdaker raraba Kaduna State nung Fulani lir. Onoki vote agüja sorkar telungpurtemi khen nung yim akümertemi nangzükba ama aika amakba mapang nung nisung tepsetba Khristan 44 tepsetogo. menokdangteter," ta ashi.

Kaduna State kübok International Christian Malagun nung Madamai aser Concern (ICC) den Abun nungger densema amak. jembidang Steven Kefas-i,

Amongnü Kachia district "Nikongdang 6:00 ako meta nung Fulani teloki Tenla ka Madamai nungi phone ajanga amakdang Khristan ka tepset kiralongrartemi parnok aser aika yiruja liasü. Iba maakdar ta metetdakja liasü. aonungjisa parnoki yim asem Kasa mapang nungjisa amak. Tesülen sepaitem aruba Malagun district kübok Abun-ajanga tamakertem jenshia a maaka liasü. Aonung 8:00 ako meta nung ang

2014 küm nunga March ita kiralongrartem oadokogo ta nung Bondong District kübok kü nem metetdaksü," ta ashi. kasa yim asem amakba Asürtemji timbaka tetsür mapang nung nisung 200 dak aser tanurtem liasü, aser tema tepseta liasü. parnok timbaka lepseta liasü.

Khristan ka tenüng agi, Nisung asüba aser yiruba dak Awan Nehemiah-i, "Yasüng alia aika samar mangur.

ozü yimdak, Madamai nung Hombarnü Kaduna State tatalokbaji meimchiri Security Commissioner, mamangtetsüsa liasü. Parnoki Samuel Aruwan-i sangdong nisung 30 dak tema tepset aser ka ajanga, sepaitem aruba aika yiruja tang hospital nung ajanga taküm aika mongdar," ta metetdaksü. kümzükogo aser iba tatalokba

Nehemiah-isa, "Parnoki dak sendakba nung melung kechi tai inyak? Onok melemei nisung ana puer Khristantem lir. Kechiba rara asüngdangyadar, ta ajak ya Kaduna State north metetdaksü.

OLONG PAITEP # 5953

1			2		3		4		5	
6		7								
					8					
9				10						
						11				
			12							13
	14								15	
					16					
			17							
									18	
19										

TIPILEN

- 2. Teburtemi tejak nung awaba - (8)
- 6. T _ _ _ em - (3)
- 8. Tzük ayudak - (3)
- 9. Nüngdakba dang timba - (6)
- 11. Züina ao - (4)
- 12. Yangi tzü angur - (5)
- 14. Tangar dang nungi tali - (4)
- 16. Senyong masü - (6)
- 17. Oadokdi - (3)
- 18. Tzü tarok - (3)
- 19. Yimtaklir aikati iba ya ki den külemi yanglusemer - (8)

LANGTSÜNGLEN

- 1. Temejangdak - (6)
- 3. Nisung ka mapa inyaktsü nübo - (4)
- 4. Azüntsü asoshi mejemba - (6)
- 5. Tesangwa agütsüba - (5)
- 7. Tila masü - (4)
- 10. Tebenjem tetsür chanu - (4)
- 11. Tekolak nung inok - (4)
- 12. Tetsüngda - (6)
- 13. Tangar inyakba ka inyak - (6)
- 14. Tim masü ta ashi - (5)
- 15. Asalendong - (4)
- 16. Tanü dangtsü - (4)

OLONG PAITEP # 5952 TELANGZÜBA

TIPILEN :

- 1. Tanga, 6. Wara, 7. Rajang,
- 9. Anük, 10. Jenjang, 11. Alar,
- 14. Ngashi, 15. Nala, 16. Mechi.

LANGTSÜNGLEN :

- 2. Anga, 3. Yabang, 4. Tarok, 5. Orak,
- 8. Ainer, 9. Anema, 10. Jabili,
- 11. Among, 12. Miim, 13. Anem.



JALA KÜM 18 TAINKA TETSÜI LADY DOCTOR DANGI ANIRARUR

Tetsü : Doctor, ozü jala ya tashi tanga, kü den sentepi aoba dak alaka kidang kidang dang amoker, tebur ta asübaji kechiar memetet, oda tanü asüng ka ya la temang mejungi pezü pelüma kazüba agi nü dangi anir aruako, khen reprangdangangma.

(Doctorni lai mapang agia tendanger ashir.

Doctor : Ya nür jalaya ita pezü mashisa-a ya!

Tetsü : Ayaya, ajibo tamakoktsüa, pai teburji tangoa mengudang nung koda!

Jala : Tangajibo doktsür ni kiss a mesüdangakodi!

(Window anasa nokdaker Doctornila pangkaa kazür)

Tetsü : Doctor, window nungji langka angur asü?

Doctor : Küm meyirjang ana jakdang Joseph o Mary na dak atalokba amato nür jala yaa holy spirit ajanga abenba asüja ta ratarba aja!

Lilir : WhatsApp

TANÜBO NAI LANGZÜANG

Q. Electric Vehicle (EV) charger dang kechi ajar?

- A.AC001 B.AD001 C.AC002 D.AC100

(Taruba adok nung onoki langzüksü)

YASHI ADOK TELANGZÜBA : Anurag Thakur

AO OSHI ANGAZÜKDAK:

TANÜ ANGAZÜKTSÜBA OJANG



Lajar

(n) tsürabur malir (orphan)

* Asenoki **lajar** kanga meimtsüla.

Lakap

(n) tzü nung aliba küpra tapu ka (aquatic snail)

* **Lakap** mulung agi azük yanglur.

NAI-A YA METETTER MA

'OCTOBER 2021' ITA TONGTIBANG ANOGOTEM:

- * 1 October : International Day of the Older Persons
International Coffee Day
World Vegetarian Day
- * 2 October : Gandhi Jayanti
International Day of Non-Violence
- * 3 October : German Unity Day
- * 4 October : World Animal Welfare Day
- * 5 October : World Teachers' Day
- * 6 October : German-American Day
- * 8 October : Indian Air Force Day
- * 9 October : World Postal Day
- * 10 October : World Mental Health Day
- * 11 October : International Day of the Girl Child
- * 13 October : International Day for Disaster Risk Reduction
- * 14 October : World Standards Day
- * 15 October : Pregnancy and Infant Loss Remembrance Day
Global Handwashing Day
World White Cane Day
World Students' Day
- * 16 October : World Food Day
- * 17 October : International Day for the Eradication of Poverty
- * 20 October : World Statistics Day
- * 23 October : Mole Day
- * 24 October : United Nations Day
World Development Information Day
- * 30 October : World Thrift Day
- * 31 October : Rashtriya Ekta Diwas or National Unity Day

SUDOKU # 5994

TELANGZUBA # 5993

	5		6		2	3		8	6	1	4	9	5	8	7	2	3	
		3						9	4	7	8	3	1	2	6	5	4	9
9	8			3		1			2	9	5	7	4	3	1	8	6	
	4	7		1				8	3	3	6	1	2	9	4	8	7	5
	6			2				5	8	2	7	5	6	1	3	9	4	
5				4	9			2	6	4	5	9	3	8	7	2	6	1
3		2		6				1	5	7	6	4	1	2	9	3	8	
4		8		7	3	5	6		1	4	2	8	3	9	6	5	7	
6	9			8		2		7	9	3	8	6	7	5	4	1	2	

OJANG LUTEP # 5539

SHIMASHI :

NGDA :

SÜBYUTA :

JIMAPA :

AÜGINBA :

MAA :

KANODGA :

OKTAK :

GUNA :

TTSMYAEINKTEÜ :

OJANG LUTEP TELANGZÜBA # 5538

TSÜNGREM TANG ASENOKI KANGRA PAI MEMOATSÜI MALIR ANUNGJI MANENI SARASADEMDI

TAN HOPTA ATEMA - KOMA SÜLA ?

Q. Nagaland nung kechà telokia menokdangi gari toztü bushia atsütetba mapatem tenzükdaktsü nunga koma süla ?

Olong 20 shi nung October 01, 2021 tashi nung iba telangzuba ya onok dangi (e-mail - tiryimyim@gmail.com) :

(SMS - 9856121232 / 9436072422) : (WhatsApp - 7005723372 / 8729995804) : (tiryimyim.in) ajanga yokang. Telangzubatemi taruba Honibarnü adoktsütsü.

Health sector tashi aittsü atema Centre-i inyaker: Modi



September 30, 2021 nü New Delhi nungi video conferencing ajanga Ato kilonser, Narendra Modi-i Rajasthan nung Medical College pezü yanglutsü atema foundation tenzüksüba noksa nung angur. Paisa video conferencing ajanga CIPET-Jaipur semzüksüogo.

New Delhi, Rongjui/September 30 (Agencies): Brihostibarnü Ato kilonser, Narendra Modi-i, Centre sorkari linük nung health sector nung temelenshi tulu alitsü aser tashi taitba akümtsü atema inyaker, ta metetdaksü.

Paisa, linük nung district shia medical college kakabosa alitsü mesüra post-graduate medical education agütsüba reju kabosa alitsü atema Centre sorkar nükjidong lir, ta metetdaksü.

New Delhi nungi video conferencing ajanga Rajasthan nung medical college pezü yanglutsü atema foundation

tenzüksüdagang pai iba o ya jembu.

Rajasthan state nung medical college pezüji Banswara, Sirohi, Hanumangarh aser Dausa district tem nung yanglutsü.

Iba sentong nung jembidang Modi-i, "Tan wara yagi alima tesem ajungalen health sector tsütsü aika angazükdaksüogo. Linük shiai yimya balala nung iba wara anema raraogo. Tangbo India health sector tashi aittsü aser tangar dak memetaloktsü atema melungtetogo. Rajasthan nung medical college pezü amenoktsü atema

maparen tenzükba aser CIPET-Jaipur semzükba ya iba denji sendaktepa lir," ta metetdaksü.

"2014 küm nungi tenzükba tang tashi nung Centre sorkari Rajasthan nung medical college tasen 23 amenoktsü atema agizükogo. Iba nungjagi tenetbo renemogo aser pezü amenoktsü atema tanü maparen tenzükba," ta paisa metetdaksü.

Paisa, 2014 küm NDA-i aniba sorkar tentetba mapang nung medical colleges nung undergraduate aser post graduate menden 82,000 dang liasü saka tangbo menden lakh 1.4 dak tema kümogo, ta metetdaksü.

"Linük nung district shia medical college kabosa alitsü mesüra post-graduate medical education agütsüba reju kabosa alitsü atema onok nükjidong lir. Iba nükjidong ataloktsü atema tesüiba küm ishika tsungda onoki teletmetba aika agiogo," ta pai metetdaksü.

Kasa sentong nung Union Health Minister, Mansukh Mandaviya, Rajasthan Chief Minister, Ashok Gehlot aser Lok Sabha Speaker, Om Birla nungera liasü.

BJP nung madentsü aser Congress-a toktsütsü: Amarinder Singh

New Delhi, September 30 (Agencies): Congress lenir aser tawa Punjab Chief Minister menden toktsüsang, Captain Amarinder Singh-i Bodhbarnü Union Home Minister, Amit Shah ajuruba sülen nisung aikati pai BJP nung adentsüa akok ta jembidar, ajisüaka Brihostibarnü pai, pa BJP nunga madentsü aser Congress nunga malitsü, ta metetdaksüogo.

Amarinder Singh aser Punjab Congress Tir, Navjot Singh Sidhu na tsungda mangatetep adokba sülen tesüsa pai Chief Minister menden toktsü.

"Congress nung ni kanga mezügmeshiogo. Ni party toktsütsü, ni party nung maneni malitsü," ta Amarinder Singh-i metetdaksü.

"Iba yimya nung ni mezügmeshi mesükdaksütsü. Item ama mezügmeshi ya ni magizüktettsü. Kü

tangatetbatem nung ajemdaker ni Congress nung melitetsü," ta pai ashi.

September 18 nü pai CM menden tokja liasü aser Bodhbarnü pa Union Home Minister Amit Shah'er kidangi oa pa den minute 45 shi senden mena liasü.

Congress tarutsü tia atema party nung taintemji kanga tongtibang, ajisüaka party nung taintem khenyongi sendoker, ta pai metetdaksü.

Navjot Singh Sidhu aija Captain Amarinder Singh-i, pa ya lokti puateter ka lir, ajisüaka pai telok koma lenitsüar memetet, ta ashi.

"Punjab nung tim mesüi yimsüsüba ajanga state aser linük nung timtem agütsütsü atema Pakistan nem maongka agütsütsü. Tanep NSA, Ajit Doval den senden amenba mapang nung iba onük nungji o lemtepogo," ta paisa metetdaksü.

Punjab tesem ajaklen 'Pind Clinics' lapoktsütsü: Kejriwal



September 30, 2021 nü Punjab kübok Ludhiana nung Delhi Chief Minister, Arvind Kejriwal aser Punjab AAP Tir, Bhagwant Mann nati osangbenertem den jembidang tangokba noksa nung angur.

New Delhi, September 30 (Agencies): Sangküm Punjab assembly election agitsü lia AAP-i iba election nung takok ngura electricity angati agütsütsü aser light bill sentsüh atoktsü, ta nangzükba sülen Brihostibarnüa Aam Aadmi Party tongti lenir, Arvind Kejriwal-i, Punjab nung party-i takok ngura party-i sorkar hospital ajak nung angati medical treatment tajungtiba agütsütsü, ta nangzükogo.

Taruba assembly elections nung takok ngura healthcare dak sendakba lenla trok party-i inyaksü, ta Kejriwal-i nangzük.

Anogo ananü Punjab semdanga mapang nung Brihostibarnü Ludhiana nung osangbenertem den jembidang Kejriwal-i, "Health services dak sendakba onük trok nangzüksü atema tanü ni yagi

aruogo. AAP-i takok ngura item ajakji atangji inyaksü," ta metetdaksü.

"Punjab nung sorkar hospital tem jenjang mejungi lir, ibayongji nüburtemji nija hospital temi ang aotsüsa akümer. Nija hospital tem nung sen tali meshir. State nung aliba sorkar hospital tem nung mozü, doctors aser facilities tsütsü nüburtemi timtem ajangshir," ta Delhi Chief Minister, Kejriwal-isa metetdaksü.

Osangbenertem senden nungji AAP Punjab Tir aser MP, Bhagwant Mann-a liasü.

"Delhi nung onoki sorkar hospital tem nung temelenshi adokdaksüogo. Sensotem health services atema ni onük trok nangzükba," ta pai metetdaksü.

"Punjab nung nisung shia nem sorkar hospital tem nung angati treatment tajungba agütsütsü. Mozü, tendangba aser operation agiba angati asütsü. Operation agiba ajanga sen lakh 10-15 adokyonga ibaji angati asütsü," ta pai metetdaksü.

"Punjab nung senso shia nem health card kaka agütsütsü aser iba nungji nisungba indang health dak sendakba report ajak keta alitsü aser data ajungaji online angutsü," ta pai ashi.

Delhi nung aliba Mohalla Clinics ama Punjab nunga "Pind Clinics" lapoktsütsü aser item ama facilities ji 16,000 shi lapoktsütsü, ta pai nangzük.

Takumbo benjung mapang longsolongben masütsüla: Centre

New Delhi, September 30 (Agencies): Benjung mongpu atongba mapang ka nung Brihostibarnü Union health ministry-i nüburtem dang lokti tulu aliba tesemi maotsü, kanga longsolongben masütsü aser Covid wara anema tetuyuba shidak beshitsü mepishia metetdaksü.

Osangbenertemden jembidang health ministry-i, nungdak melira ainlen mesenzü tajungba asütsü aser longsolongben masütsüla, ta metetdaksü.

"Nisung tali longsolongbenba ajanga Covid

kanga prokshitsü, anungji ainen mesenzüba den longlongben masütsüla," ta Health Ministry-i metetdaksü.

Union health secretary, Rajesh Bhushan-i, "Linük nung teshirangdakpur kanga ajema kümdar aser shiranger anepba shilem timba kümdar. Linük nung iba tashidak puteter shilem 98 jungnüa anepogo. Tang anogo shia nisung lakh 15-16 dak tashidak tendangdar," ta metetdaksü.

Tanurtem atema Zydsu Cadila vaccine dak sendakba nung health ketdangsertemi,

tang iba vaccine ya market nung mangur, saka iba vaccine ya Covid vaccination programme nung inoksemtsü, ta metetdaksüogo.

ZyCoV-D ya ajem mamshiba dose 3 vaccine ka lir aser iba jenjang latettsü atema tang iba vaccine yanglurtem den tejembidak lir, ta parnokisa metetdaksü.

"Tang nükjidongji tain nütsüng ajak nem vaccine dose anaprong agütsütsü atema lir. Tang atemabo booster dose indang mejembir," ta ICMR DG, Dr Balram Bhargava-i metetdaksü.



September 30, 2021 nü Himachal Pradesh kübok Lahaul & Spiti district nung ITBP sepaitemi tenemlen nungi tenemleni atur nisung ana tasümgang bener aluba noksa nung angur.

Philippine VP Leni Robredo-i tir atema tokteptsü

Manila, Rongjui/Sept. 30 (Agencies): Philippines indang tatong tir aser Tir Rodrigo Duterte-i temesepba mozü anema raraba maparen kanga sashia anema nokdaker, Leni Robredo ya 2022 küm May ita tir election agiba nung toktepdaktsütsü atema opposition coalition ajanga shimtetogo.

Leni Robredo ya 2016 küm Duterte tir akumba mapang nungi tatong tir inyaka aru, saka la ya opposition ka ama züngshir aser Duterte-i miim mozü anema raraba nung nisung meyirijang aika tepsetba ya tamakok ka lir, ta lai ashir.

Philippines nung tir aser tatong tir ya balala shimteter, anungji Duterte aser Robredo na ama aiben party balala nungi candidate shimteta office nung külemi inyakba mapang mangatetep adoker.

Brehostibarnü sangdong ka nung 1 Sambayan ta ajaba coalition züngsemtemi ashiba agi,

linük anitsü atema telung nung survey agiba nungi Robredo ya candidate tajungtiba, ta temolung lemteta lir.

Robredo-i asen linük anepja anitsü, rongsenketzüng asendenshitsü, employment adokdaksütsü, makamait samadaksütsü aser külem Filipinos tepsetba tatem kati arudaksütsü, ta taoba mapang Supreme Court Justice Antonio Carpio-i ashi, shiba coalition ka nung lenir lir.

1 Sambayan coalition züngsemtem nung kanga akumtsübu amshiba legal aser foreign policy nung mongintem, human rights aser civil rights advocate, opposition politician, aluyimer telok, kaketshir aser mitkar mapanungi anener alirtem lir, shirnoki Duterte sentong anema raratsü lungjema lir.

"Sorkari meshidaki ketdangsüa ano küm trok melitetsü amai onoki amanger," ta Carpio-i sangdong ka nung ashi.

Social media post ka nung Robredo-i pelaba lemsatepa liasü.

"Tanü nungi tenzüker asenoki telemtetba agiba ya linük asoshi tajungba asütsü sarasademba nung küden nenok liangma," ta lai Tagalog aser English oshi nung ashi.

Iba coalition yagi Manila Mayor Isko Moreno ya shimtsü nungshidang, saka vice president inyakba otsü asadanga sülen Robredo ya shimtet.

Moreno, shiba taoba mapang Duterte den tembar liasü, paia taoba hopta tir atema tokteptsü sangdonga liasü.

Philippioens tir inyaksü atema election nung tokteptsü asoshi candidate tenüngtem ya Hokulbarnü nungi tenzüka October 8 tashi agütsütsü.

Moreno kisung masü tir atema yimjak nung candidate sangdonger ya international boxing champion Senator Manny Pacquiao aser taoba mapang police tekolakba aser tang Senator teinyakdak Panfilo Lacson densema lir.

Ecuador tepuokdak nisung 116 tepsetba sülen emergency sangdong

Guayaquil, Rongjui/Sept. 30 (Agencies): Ecuador tzükumlen tepuokdak tesem ka nung telok balala tsüngta raraba mapang nisung 116 taküm sama aser nisung 80 yiruba sülen tiri prison system nung state of emergency sangdonga liasü.

Mongulbarnü Guayaquil nung aliba Litoral penitentiary nung azüdokshidak ya nisung pongu bo tekolak tangzüka yoker liasü, aser ibai linük nung tepuokdak azüdokshi tamajungtiba alitsü, ta ketdangsürtemi ashir.

Tir Guillermo Lasso-i Bodhbarnü menur state of emergency ya sangdonga liasü. Iba yagi sorkar nem tashi agütsür aser item rongnung tepuokdak tesem telung nung police aser sepaitem yoktsü dena lir.

Osangbener senden ka nung jembiba mapang, ketdangsürtemi iba tesem tanaben azüoktetogo ta meshitetsü, ta Lasso-i ashi.

Pai iba azüdokshi ya tamajung aser tejashitsü ka lir, ta ashi.

"Tepuokdak tesem ya mapa tamajung inyaker telok balala tsüngta tashi agi raktepba tesem ka kumdaktsüba ya tesasatsüka lir. Litoral prison tanaben azüoktsü asoshi tapet mapa inyaksü aser danga prison temi azüdokshi prokshia aoba nungi kumzüksü," ta pai ashi.

Social media nung noksa prokshiba nung iba tepuokdak pavilion 9 aser 10 nung nisung tasü mang ter dak tema liasü aser iba tesem ya tongpang raraba tesem mesüka liasü. Iba rara nung prangbong, kotari aser bomb tem amshia liasü, ta ketdangsürtemi ashir.

Regional police commander Fausto Buenano-ia nisung tasü mang kar iba prison indang pipelines nunga ngutet, ta ashi.

Iba tepuokdak nisung tasü mang ayuba kimalen asür kinungertem jeptepa liasü aser parnok kinungertem ya taochi mesayui tepset aser karbo temang shilem balala rangsar liasü, ta ashi.

"Linük indang puti otsü nung iba ama mesüra mesüktepa atalokba meliasü," ta Ecuador indang National Rehabilitation Council nung taoba tir, Ledy Zuniga-i ashi.

February ita tepuokdak azüdokshiba sülen iba ama nisung jenti tepsetba nungi kumzüksü atema mera agia

maliba atema sasar, ta Zuniga-i ashi, shiba 2016 küm linük indang minister of justice liasü.

"Los Lobos" aser "Los Choneros" prison gangs tsüngta mangatetep adoka azüdokshi ya tenzü, ta ketdangsürtemi shia liasü.

Ecuador indang military intelligence nung taoba mapang director inyaka alisang Colonel Mario Pazmino-i ashiba agi, azüdokshia raraba ajanga Ecuador indang tepuokdak tasa yanglur mapa tamajung inyakba yimya tentetba sayur aser Mexico nung aliba Sinaloa aser Jalisco New Generation cartels tem yangji aliba gang tem den sendaktepa lir.

"Parnoki tetsübu aitdaksüner," ta pai The Associated Press news agency dang ashi aser sorkar dang khen atema prison ya National Police nem azüokdaksütsü ajungshi.

Parnoki yimya tamajungtiba nung tepsetba ama parnok nükjidong nung tali takok angutsü, ta pai ashi.

Tepuokdak alirtem kinunger atema chiyongtsü atema psychological support indang care points tem amenokogo, ta Ecuador tiri ashi.

Linük nung tepuokdak tesemtem tajungba kuma yanglushitsü atema sen million \$24 jenjang sentong balala tenzüksü, aser mezü ngbuba nung Litoral prison indang ki-o-jen aser technology yanglushitsü, ta pai ashi.

Mongulbarnü azüdokshi ya linük nung tepuokdak tesemtem nung azüdokshia aruba rongnung tetesüba dang lir.

February ita nunga linük nung tepuokdak tesem asem nung mapang anasatepa azüdokshiba mapang tepuokdak alir nisung 79 takum sama.

July ita nunga tepuokdak tesem kar nung azüdokshia yangji alir nisung 100 dak tema takum samaba sülen tiri prison system nung state of emergency sangdonga liasü.

Item asürtem ya tepuokdak tesem balala nung liasü, aser Mongulbarnü tepsetba ama tesem ka kisung nung masü. Iba mapang Litoral penitentiary nungya nisung 22 takum sama.

Ecuador indang prison system ya nisung 30,000 ayutsü atema facility 65 yanglua lir, saka linük nung tepuokdak alir ya 39,000 lir aser staff agi kanga anunga lir.

Ho Chi Minh yimti nung COVID lockdown agientsü

Ho Chi Minh, Rongjui/Sept. 30 (Agencies): Vietnam nung yimti tulutiba nung lockdown Hokulbarnü agientsü, anungji coronavirus tashidak jateta aliba azüoktsü mechi senzüsempogba nung ita asem jungnüa tenokdangba agüja aliba tatem kati arur.

Nisung million 10 aliba Ho Chi Minh City nung alirtemi pei ki yutsür otetsü, restaurant nung bener aoba chiyongtsütem agütsütsü aser danga tongtipang business tem lapoktsü, ta Brehostibarnü iba yimti indang website nung shia liasü.

Ajisüaka social distancing totuyubabo maneni alitsü. School tem shibanga lir, public transport mesenzütsü, yimti nungi dangaleni aoba aser dangalen nungi yimti-i aitba

azüoktsü aser tema nung nisung ter dak tema adenshitsü memelar.

Maparen aser sentong balala nung adentsüpuri vaccine agiba kuli sayutsüla, ta ketdangsürtemi ashir.

July ita tiyonglen COVID-19 cases tali akumba ajanga Ho Chi Minh City den southern province 18 tashinung lockdown sangdonga liasü.

Taoba ita asem tsüngta iba virus indang Delta variant yagi nisung 770,000 menepogo aser nisung 19,000 shi takum samatsüogo, ta health ministry ajanga ashir. Vietnam nung COVID-19 agi asüba ya timba iba wave mapang liasü aser asürtem ya timba Ho Chi Minh City nungi lir.

Danga southern yimtitem nunga lockdown lapokogo aser

tashidak menatepa aoba ajema akumba ajanga inyaksangshi balala tanem tanemi tenzüksüshir.

Ita tetenzüklen Vietnam nung anogoshi nisung 14,000 shi dak COVID-19 tashidak puteta liasü, saka taoba hopta asemsü agi tajemba akum, health ministry ajanga ashi.

Ho Chi Minh City nungi kilometer 70 shi pilar aliba Vung Tau yimti nung lockdown mapang traffic azüoktsü atema barricades inokba agiandang yangji aliba nübürtemi tepela agi ola agütsü.

Linük tanaben lapoktsü mechi Vietnam nung COVID-19 mozü agütsüba maparen kanga ilonga inyaker aser mezü ngbuba nung yimti tulu aser industry aliba tesemtem nung temolung agütsür.

Taoba hopta Ho Chi Minh City indang health ketdangsürtemi AstraZeneca shot ana tetsüngta iter agiba hopta trok dang kumtsü, saka mozü yanglurtemibo tetsüngta hopta ti nungi 12 tashi alitsüla, ta ashir.

Yimti nung mozü agitsü temsüa alir nisungtem shilem 98.5 bo mozü agiogo aser shilem 48 bo mozü dose anaprong agiogo, ta health ministry ajanga ashir.

Ajisüaka Vietnam nung nütsung yongsük million 98 aliba nungi vaccine dose anaprong agir ya shilem 9.3 dang lir. Mozü agi anungba ajanga nübürtem nem mozü agütsütsü menur, ta ketdangsürtemi ashir.



Hawaii indang Kilauea volcano ya "full swing" nung jateta adokogo, ta United States Geological Survey (USGS) ajanga ashir iba yagi tangbo nübürtem nem timtem agüja mali, ta yangji aliba osang balala ajanga ashir. Bodhbarnü webcam ajanga tangokba noksa ka nung volcano tebang nungi tango alonga liasü. Kilauea ya Hawaii indang Big Island nung lir, aser alima nung 'most active volcano' tem rongnung ka, ta züngshir.

Oya Asüla L. Azungla (Chuchuyimlang) nem Sangru Sangoktsür

~ L. Obangtemsü, Dimapur



Alima aser yangji aliba taküm süngdong arem naro tebur tajung ajak tournem keta kanga junga adoker aser mapang telatet ka sür sama aoer.

Oh! Saka Oya, nabo kangasa ano-jungi arishi tempanga-ni ta, anogo adok monungrajen monungraer.

Na sür tanü-i küm ka rentetdang tasüba anogo-mong masü saka na asoba anogo benjungmong amonger ta sünüa-li;

Na akümüli aliba to onok asoshi ajak aser ajak metalokdak kidi ki tongshi medem kecha dena medemtangtsü makok.

Lanuwa nungi nü pang nungi mo-oktsüba chi mejaka intet, tain kumdaka zulu panglu kaket reju nungi sayu-a taküm lemanng nung tesayur tajungdila na asüa-süng;

Akümüli khuret teinaktsü jenti ajurudang temulong dok shisa tajung agütsür Oya na asü;

Tanü onok tasüngtang dak maka shisa rama-er, na akümüli nung ta-tsüka onok den aliba to koda senti asü-a ka ta meyima nüksü aidokjen aidoker.

Ken-ken molung süngzüka na taküm lir ama nuklai arua, mobile nung Oya Azungla ta alidak nemshia tenarong nung maloker angatanger, saka switch off ta meyiba langzütang, Oh! küyi to asangsang sür asü-a na ta ozü molung tali-ang kohremshir.

Tsüma lenden lima nungi yimti tenem tasoli tebur ajung penzüa kodang-ang ozü yimti atongtsü ta yungponga aruba to tanübo yimti ajak to tsüngtangpiya konga azünger, azüngmeyak yimti kümogoni,

Nü temiem münürem jakden to onoki kong angutsü? Teroto ajungben yipru agi kidi kilem raksatsü medem onok rongjenseter.

Ken tang sürbo ano tanüben taküm meyibasa alangzükdaksüra ta asü-bo, Oya na asoshibo Hon aser Taribi noklang agia alangzüksü asü yim jagi-a arula-süng;

Oh, saka Otsüla Obula nungeri ashi medem, anünyungpang Tsüngrema asüra ta asü nung asen ali meimchir kala kechiaka?

Asü yim nungi shisa meyiba aruer? Takar, sensaker, alima chuba ajak saku-ku shingaia malangzükdet, shiba tang akümüli taneben kümjang ta ashitsü?

Oh! Aji oda onok molung süngzük dak ka lir, kong akümlir ajak ka ken-ka ken ta Tebu kidang sendentsü aser yangji tajeba aser nüksü mali teti tepela dak na ajurutsü ozü akümlir sarasadem.

Onoki teti meima aliba Ojala ASÜR AKANGZUNGLA (Chuchuyimlang) Sür küm ka ajungba menungra bilemtetter 1st October 2020

"Iba akümüli nung onoki na kangasa menungrar aser anogoshia onoki na bilemtetter...Onok taküm asoshi na tesangwa ka liasü.....Nai onok toktsür aoba agi, onok taküm nung iba tesangwa lemsateper mali kümogo, saka onok molungjang nung na teti lir"

~ Temeimertem

MAMATETER LT. IMTITOSHI LKR (AKHOYA) TASÜBA KÜM: 1st OCT 2020

Temeim Oba,

Na iba akümüli toktsür tanü küm ka abensar. Oba, onoki na amatsü makok aser onok mulungjang nung teti na menungra nüksü yima bilemteter. Saka na Kibuba den lir ta onok mulong anisüngzüker.

Tanü, Ojalai anir kinunger ajaki na bilemteta sarasadema akumtsübu agatsüa amonger.



~ Temiem kinungtsü,

jabaso kibongtem aser kinungertem.

Advisor Tovihoto-i '10 Kva UPS' ka tenla agütsü

Dimapur, Rongjui/September 30, 2021 (TYO): ICU, District Hospital Dimapur atema Bodhbarnü (29.09.2021) Advisor, Department of Power, H. Tovihoto Ayemi-i '10 kva UPS' ka den accessories tenla agütsü, ta sangdong ajanga metetdaksü.

Taküm May ita Advisor-isa District Hospital nung cardiac monitor ana tenla agüja liasü, ta Medical Superintendent-i ashi.

Mozüki nung nüngdakba ajiteta molungsoa tenla agütsüba atema, Medical Superintendent District Hospital Dr. Khreilasanuo Metha den District Hospital Dimapur indang staff temi Advisor dang pelaba metetdaksüogo, ta kasa sangdong nung shia lir.

TENÜNGSANG AGÜTSÜR

Dr. Shiluina, Unger Laishir rongnungi mezüng Senate of Serampore College (University) nungi "Christian Feminist Ethics" onük nung Doctorate jenjang ngutetba takok asoshi la nem Unger Laishir Telongjemi tenüngsang tulu agütsür.

Dr. Shiluina bushitetba Tsüngremer shisatsü taseen ajanga asen nüborsem dang masü saka alima ajak ajangzüksü teimla nung Unger Laishir Telongjemi sarasadema pelaba lemsateper. Tsüngremer la taküm aser wadang tali mojangma .

Sd/-
IMTINUNGKUM
President,
Unger Laishir Telongjem.

MOLUNGNEN O

Aso: 13.09.1931

Asü: 28.09.2021

Asür TSUKNUNG MENLA Ozukum (Molungkimong)

Onoki teti meima aliba Ojala Tsuknungmenla shiranga aliba mapang nungi tasünü tashi kidang-kiyonger, medemsor, yimtsür-yimer, anük-apang kwi kati rongsen nübu aser tamang sarasadem agi ozü den yaritepogo, nenok ajak dang kangasa peleba lemsateper. Tsüngremer nenok mapa tajung asoshi maneni mojangma ta onok sarasadem.

~ Temeim chirnur, semchirtem aser kinungertem.

Ezhotöü Keyho-i 'Miss Phek 2021' takok angu

Kohima, Rongjui/September 30, 2021 (TYO): Mongolbarnü (29.09.2021) Phek jila kübok ayonga agiba Miss Phek 2021 sentong nung, Ezhotöü Keyho-i takok korang nguogo, ta sangdong ajanga metetdaksü.

Iba tetoktepba nung, Lovi Jidogi aser Venulu Nienu nati first aser second runner-up title ngua liasü.

Vogue Entertainment Nagaland (VEN) tawabangba kübok Phek Town Chakhesang Students' Union (PTCSU) den

longjemer Miss Phek 2021 sentong agia liasü.

Iba sentong nung, Miss Nagaland 2012, Miss India Elite Runner-up 2015 aser Miss Super Talent World Runner-up 2016, Imlibenla Wati Nienu tetushi tesemdang ama aruagi denogo.

Miss Phek 2021 title atema contestant 10 agi shilem agia liasü.

Kasa tetoktepba sentong nung sub title takok angur kongru temji, Miss popular - Chiewotso-ü Koza, Miss congeniality-CA Agnes Dukru, Miss Beautiful skin -Venulu Nienu, Miss Rampwalk-Lovi Jidogi, Miss Talent -Avikürhe Ngouri aser Miss photogenic - Ezhotöü keyho nunger liasü, ta kasa sangdong ajanga metetdaksü.

IN THE COURT OF
PRINCIPAL DISTRICT & SESSIONS JUDGE
MOKOKCHUNG : NAGALAND
S/C NO. 172/2021

NOTICE
NOTICE INVITING CLAIMS/OBJECTIONS OF OTHER CLAIMANT(S)
FOR ISSUE OF SUCCESSION CERTIFICATE UNDER PART-1 OF
INDIAN SUCCESSION ACT 1925

Whereas application under Succession Act 1925 for grant of Succession Certificate for the estate/ pension benefits of Late Imtishilu has been applied by Shri/Smti L. Atula sister of Lt. Imtishily R/O H.No. 54 Changtongya Town Mokokchung, Nagaland for possession of

1. GIS
2. Gratuity
3. Leave encashment
4. NPS etc
5. Closing of A/c

Notice is hereby given that any person having interest in the administration of the estate/pension benefits of the said deceased may if she/he so desire appear in this court on or before the said day of 23.10.2021.

Given under the hand and seal of the court on this the 23.9.2021.

Principal District & Sessions Judge
Mokokchung : Nagaland

Mkg nung 22 buba Inter-Dist Dr. T. Ao Football Championship ayongtsü maparen tenzükogo



Mokokchung, Rongjui/September 30, 2021: Abilen nungi Co-convener Wb. Imlikümzük Longkumer, MDFA tir Wb. Meyisanger Lemtur, Convener Wb. Merentoshi R Jamir aser MDFA Secretary Wb. Spongwati, parnok osangbener senden ka lir tangokba noksa nung angur.

Mokokchung, Rongjui/September 30, 2021 (TYO): 22 buba Inter-District Dr. T. Ao Football Championship sangküm 2022 March mesüra April ita nung Mokokchung nung ayongtsü tebilemba lir, ta tanü Dr. T. Ao Football Championship 2022 convener, Wb. Merentoshi R Jamir-i parnok planning committee pur mezüing senden ka yangi Mokokchung nung mener külen osangbenertem den jembidang metetdaksü.

Dr. T. Ao Football Championship ya Nagaland Football Association (NFA) akhüm nung Mokokchung district football association (MDFA)-i ayongzüka Imkongmeren Sports Complex Mokokchung nung akatsü aser iba maparen atema nisung 23-i akümba planning committee shimtetogo aser maparen balala lemsar inyak tenzükogo, ta Merentoshi-isa ashi.

Tanü planning committee mezüing senden amener asünung, asayamung dak sentakba kechisarena abensa/renemabo mejembitep saka koma aotsü ta asüba tongmelang ka dang jembia liasü saka yakta iba dak sentakba osang tejangja metetdaksütsü, ta paisa shisem.

Dr. T Ao ama asayamung tulu ayongtsü Mokokchung district nem maongka aser yimli agütsüba asoshi NFA dang pelaba pai metetdaksü. Saisapong dak sentakba nungdakattemji kanga apara aser asenok ajaki state sorkar tiaji temetdang, ibayongji asenok ket nung kechi aka iba jagi akokba tashi tajungba anepalutsü merangtsü, anungji, nüburtem nungi tenungitba aser teyari kanga nungdaksü, ta paisa ashi. Ibai Mokokchung district nüburtem aser Ao kin atema

maongka aser jenjang tulu lir, ta pai shisem.

Iba asayamung ya state sentong ka lir, kechiyong district 12 nungi arua shilem agütsü, anungji, iba asayamung junga ayongtsü asoshi nüburtem nungi shisatsü den rongsen aser sarasadem akanger, ta co-convener, Wb. Imlikümzük Longkumeri ashi. Iba asayamung ya tanga district den tembar yimteptsü nüklayur tajungtuba nung ayongtsü merangtsü, anungji, nüburtemi ibai takok angutsü asoshi shilem agidaksünür, ta paisa tayongzükba ka agütsü.

Tawa 1st Inter-district futsal tournament nung Mokokchung nungi Telongjem FC-i champion ajangzükta district nem konang nungsang bener aruba asoshi tetushi lemsateper, ta MDFA lenirtemisa metetdaksü.

Champions League: Man United-i goal 2-1 agi Villarreal kokogo

Old Trafford, Rongjui/September 30, 2021 (Agencies): Bodhbarnü, Champions League asayamung Group F nung Manchester United aser Villarreal na asaya liasü. Old Trafford Stadium nung team ana asayaba mapang, United aser Villarreal napronglai goal ka ka idaksür asaya tatemleni arua, mapang talila apuloktsür asayadang, Cristiano Ronaldo-i Manchester United atema goal tanabuba idaksü.

Kasa asayamung Group E telemsa nung Bayern Munich-i goal 5-0 agi Dynamo Kyiv tsükdaksü. Kasa Group nung, Barcelona puri goal 0-3 agi Benfica makok aser Group H nung Juventus-i defending champions Chelsea madak goal 1-0 agi takok angu.

Iba League - Group F asaya nung Man United aser Villarreal napronglai goal ka danga meinoktsütetti mezüing half tembangba sülen, tanabuba half nung Villarreal atema Paco-i minute 58buba nung mezüing goal idaksü. Tatsüka dang lir, United-ia telangzüba agüja, minute 60buba nung Telles-i goal 1 idakja telok ana

tsüingda goal 1-1 kumadok.

Asaya temer mapang talila (90+5) apuloktsür asayadang, United-i iba asaya akoktsü atema Ronaldo-i telok atema goal tanabuba idakja liasü.

Ronaldo indang goal ajanga Group F nung United puri Villarreal ajateta tasembuba jenjang tongtetogo. Ano külen, European championship pungoben tashi takok angur Barcelona pur goal 0-3 agi tamakok anguba sülen, Group E nung Barca pur jenjang pezüubai luogo.

2009 küm iba League final nung Man United-i Barcelona makokba sülen, iba club nung tanaben asaya pungo nungi Ronaldo-i goal pungobuba idaksür asütsü.

Champions League Group E nung, coach Ronald Koeman'er telok Barcelona puri goal 3-0 agi Benfica makokba ajanga Spain indang club-i Champions League takok angutsü teimla makai kumogo. Tan Champions League nung, Barcelona-i asaya ana nungi point ka danga mengutet aser Group E nung parnok point trok agi Bayern Munich aser point

pezü agi Benfica tesülen kumogo.

Champions League Group H nung, Juventus nungi forward asayar Federico Chiesa-i goal ka idakja par teloki goal 1-0 agi Chelsea kokogo. Mezüing half tashi telok kati danga goal meinoktsüteti tembangba sülen, tanabuba half tenzükli Federico-i iba goal idakja liasü.

Kasa League Group H nung, Bayern Munich-i goal 5-0 agi Dynamo Kyiv tsükdaksü. Iba asaya nung, Bayern striker Robert Lewandowski-i telok atema goal ana tashi idaksü. Ano, Bayern atema Gnabry (68), Sane (74) aser Moting (87) nungeri ka ka idakja Bayern-i tesemdanger team Kyiv madak takok angu.

Tetoktepba ajunga nung, Bayern puri asaya tuku tashi atonga takok angur asütsü.

Poland nunger Robert, shibai taoba Honibarnü Bundesliga nung goal ka danga meinoktsütet, Champions League nung, asaya tenzük minute 12buba nung pai penalty ka idaksü aser minute 27 nung goal tanabuba idakja liasü.

Inter-Departmental Badminton Tournament ayongzüksü

Kohima, Rongjui/September 30, 2021 (TYO): Assembly Secretariat Stadium, Kohima nung, October 22 aser 23, 2021 nü Department of School Education, Nagaland-i 1st Inter-Departmental Badminton Tournament ayongzüksü sentong renemdar, ta sangdong ajanga metetdaksü.

Mongolbarnü, press conference ka nung iba asayamung atema schedule sangdongba mapang, Principal Director, Department of School Education, Shanavas C-i, Covid-19 tensa ajanga küm ana jungnüa Sorkar department temi departmental indang maparen kecha meinyakteti, iba tesashi wara azioktsü aser nüburtem iba tashidak nungi kümzüka ayutsü asoshi inyaka aruogo. Department balala nungi sorkar tenzükba wadang nung

inyakertem aser department balala tsüingda tesendaktep tali akangshidaksütsü aser amalitepa inyaka aotsü nükjidong nung iba asayamung ayongzüker, ta ashi.

Pai ashiba agi, Department shia dang Women's Doubles aser Mixed Doubles category nung team ka ka yoktsü aser Men's Doubles Category nung department shia nungi team ananai shilem agitetsü akok ta osang agütsüogo.

Iba asayamung nung shilem agütsü atema, category shia dang entry fees, sen 2000 agütsü aser, category shia nung takok angur aser runner-up nem senpet 12,000 aser 8000 agütsütsü, ta Shanavas-isa ashi.

Maneni, iba asayamung nung shilem agütsü atema October 13, 2021 tashi registration mapang lapoktsür, ta Shanavas-i metetdaksü.

Rupinder aser Birendra na hockey asaya nungi anener

New Delhi, Rongjui/September 30, 2021 (Agencies): India nunger hockey star, drag flicker Rupinder Pal Singh aser defender Birendra Lakra, shirnoki Tokyo Olympics nung külem Hockey team den shilem agia bronze medal takok angu, Brehostibarnü asayar anapronglai hockey asaya nungi anenba osang sangdongogo.

Asayar tasen nem maongka agütsütsü tebilemba nung Rupinder-i hockey asaya nungi anentsü osang sangdonga liasü. Kasa mapang, Birendra Lakra asaya nungi anenba osang ya Hockey India ajanga metetdaksü.

Osang ajanga angazükba agi, asayar anapronglai dang scheme balala atema maongka magütsütsü aser iba den külemi taruba hopta Bengaluru nung ayongzüksü aliba National Camp nung tena (Rupinder aser Lakra) manioktsü ta osang agütsüba sülen, asayar anapronglai hockey asaya nungi anentsü telemtetba agi.

Rupinder, shibai küm 13 tashi India tebur team atema match 223 shi asayaago, pa ya drag-flicker tajung ka ta ajaki jangjaa lir.

"Asayar tasen nem maongka agütsütsü aser iba asaya tsütsü tajangshiba jenti alir asayar tajungtem nem lenmang lapoktsütsü atema mapang agi tongogo ta bilemer. Tesüiba

küm 13 tashi team den iba asaya nung ni ajangshia arubatem parnok (asayar tasen) nema ajangshidaksünür," ta asaya nungi anensang Rupinder Pal-i ashi.

"Küm 13 tashi team den India tenüing nungi jangratema asaya aruogo aser ni ajangshibatem asayar tasen aser sempet tajung alirtem nema ajangshidaksütsü atema maongka agütsütsüla ta bilemer. India jersey semer asaya 223 nung shilem agütsü maongka nguogo aser ibaji konang ama agizük aser ni atema item asaya ajak balaka liasü aser saisapong meimba linük ka atema asayatetba atema nüma-atanger," ta pai ashi.

Arishi küm 31 tain Lakra-i team indang vice captain ama Tokyo Games nung shilem agiogo. 2014 küm Incheon nung ayongba Asian Games aser 2018 küm Jakarta nung team-i bronze medal anguba mapang, Lakra-i shilem agiogo.

Iba asaya temer, India team pur linüki meyipa aruba sülen, Hockey Chandigarh ajanga ayongba sentong ka nung, Haryana Angh Bandaru Dattatreya-i Rupinder aser külem team pur Gurjant Singh naprongla nem senpet lakh pungongo agütsü.

BILEMDANGANG

"Shibai sangrateta tongpang akoker naroküm agütsür."